



Sujet: 1996

### **„Mir streike au ... „**

Euses Sujet isch populär,  
s'chunnt nit vo ingefähr,  
mit ihm bisch im Trend, ganz genau,  
denn's heisst: "MIR STREIKE AU ...!".

Wenn de hüt streiksch, denn bisch IN,  
s'interessiert e keine, wägem Sinn,  
d'hauptsach isch, Du blibsch derbie hocke,  
oder machschDi für e Demo uf d'Socke,  
das chönnt Aerger geh, das duesch kalkuliere,  
denn nach e'me Streik duesch meh verdiene,  
mit dere Istellig, s'isch halt scho wohr,  
machsch di überall schnell zum Narr.

Drum liebei Lüt, düend guet lose  
und dänked nur emol an d'Franzose,  
4 Woche streike für meh Gäld,  
verspottet und verachtet uff dr Wält,  
dr Oberschuldig, isch de Sagg,  
mit em Name Jaques Chirac,  
de loht sich dä Streik gärn log falle,  
hauptsach er kann sini Bombe lo knalle.

Oder stosch im Süde amene Zoll,  
findsch nit luschtig und au nit toll,  
so weisch: d'Zöllner die Affe,  
dien wieder streike, anstatt schafe.  
Nit nur im Süde, au im Norde obe,  
ganz genau dört bi de Schwobe,  
händ d' Arbeiter vo Metall und Kohle,  
mit em streike me welle ussehole,  
die andere düend sich das nit getraue,  
mache lieber: „Schaffe, Schaffe, Häusle baue ...!“

Au Schwyzer Bure sind vom streike ganz entzückt,  
doch was diä biete s'isch verrückt,  
will bi dr' Migros und au bim Coop, s'Fleisch chasch billig chaufe,  
bringtdas de Bure, s'Fass zum überlaufe,  
so sind diä Sürmle ohni viel studiere,  
eifach agfange Grossmetzgerei'e go blockiere.

Was eso ne Protest alles cha bringe,  
vo däm channt d'Fussball Nati es Liedli singe,  
händ dr Wält, die muetige Cheibe,  
numme ihr „Stop it ... Chirac“ welle zeige.  
D'Reaktion vom Verband finde mir en Bschiss,  
statt Unterstützig, numme es riese Gschiss.

Sogar in Basel händ s'is t'scheggt,  
und die Wälle au für sich entdeckt,  
s'BVB Streikmotto, nundefahne,  
„Eifach stohblibe, nümme witerfahre“  
So ne Streik duend Lüt nit abchaufe,  
den villi händ müesse laufe,  
die vodr BVB findes trotzdäm toll,  
so git's en paar Tag spöter nonemol.

Au Prattele will bim streike nit hinde a'stoh,  
und het prompt dr 1.August sause loh,  
s'ganze muesch jetzt positiv g'seh,  
jetzt gis a dr Fasnacht e Sujet meh.

Was Eus gar nit duet positiv stimme,  
isch en andere Streik, e ganz en schlimme,  
will am Sunntig wirsch in keinere Beiz meh bsoffe,  
s'händ jo alli Wirte-Sunntig, also nit offe.

Mir gönd au go d'FCB-Match schau,  
und finde's frech was die sich mängmol getraue,  
will streike isch, me chas nit steigern,  
anderscht gseit: „d'Arbet verweigere“  
duesch die ganzi Sachvo dere Site gseh,  
so streike sie au bim FCB.

Euse Bangg isch jetzt am Aend,  
mir hän d' Euch gsait was mer wänd,  
drum weis jetzt au jedes Chind,  
wieso mir uf das Sujet cho sind,  
und vor luter Streike simmer nüm so z' wäg,  
drum gäbe mir Euch no en Tipp uff Eure Wäg,  
Düend s' Streike besser nit versueche,  
das empfähle Euch d' Dorfplatzrueche.